



Luisia Monn-Hendry, Sedrun

Ils 15 da zercladur 2004 annunzian ils zenns da s. Vigeli la mort da nossa cara mumma Luisia Monn-Hendry.

Ella ucliva da Cavorgia ei nossa mumma naschida ils 21 da mars igl onn 1923 sco feglia dils geniturs Giachen Antoni Hendry e Genoveva nata Monn. Ella ei carschida si cun 7 fargliuns. El ravugl da quella gronda famiglia ha ella passentau sia affonza. Las scolas ha ella frequentau a Cavorgia. Suenter scola eis ella serendida per 1 onn a Cuera tier ina famiglia cun 6

affons per emprender il lungatg tudestg. Suenter quei onn eis ella puspei turnada a Cavorgia per segidar a casa. Quei temps ha ella aunc luvrau en fabrica a Sedrun tier Luis Jacomet. Pli tard ha ella empriu il mistregn da cusunza a Zarcuns. Igl onn 1945 marida ella il giuven Giusep Monn da Surrein. Beingleiti crescha la famiglia. Sis affons, numnadamein 4 feglas e dus feglas portan bia legria, denton era lavur e quitaus sco dapertut.

Tochen igl onn 1970 han nos geniturs menau ensemens lur fatschenta da pasternaria sil plaz Cadruvi.

Suenter cu la mumma ha saviu prender pli pacific, ei siu grond habi staus sias carezadas flurs. Seigi quei en siu iert nua ch'ins entupava fetg bia la tatta Luisia sper sias flurs, quei era siu liug preferiu. Cheu ha ella passentau bia bialas uras, ed ord mintga stumbel vegneva ella da far crescher fluras. Naturalmein era il santeri astga buca muncar, leu tgirava nossa mumma in temps 15 fossas. Il pli bugen era ella la damaun baul giu leu e gudeva la ruasseivladad.

Ses 13 biadis han era purtau ad ella bia plascher e tutz mavan adina bugen tier la tatta Luisia. Leu savevan ins guder da termagliar e malegiar sin ina tut speciala moda. La tatta sevilava mai ed era adina da buna luna e pazienzia haveva nossa tatta sco negin. Adina haveva ella reserva da tschugalatas ni «gummiberlis» ni quei che mintgin haveva il pli bugen. Nossa tatta haveva adina ureglas aviartas per tut nos quitaus.

Quest unviern ha nossa mumma entschiet a buca sesentir aschi bein. Il cor e las auas mudergiavan ella. Ils 13 d'avrel ha ella stuui serender el spital a Glion. Suenter 2

jamnas astga ella puspei turnar a casa. Dapi lu ei sia dimora stada tier sia feglia Sigis. Mo las forzas han schau suenter e nossa mumma haveva ussa il giavisch dad ir tiel bab. Mardis endamaun, ils 15 da zercladur 2004 eis ella sedurmentada en tutta tgeuudad per far il viadi e bandunar il terrester.

Cara mumma, Tia largia sa buca vegnir remplazzada. En num da nus tuts, affons e biadis lessel engraziar a Ti per tut Tias grondas stentas e tut il bi e bien che nus havein astgau guder cun Tei. Nus vegnin segir a mantener Tei adina en buna memoria. Engrazia fetg cara mumma per tut.

Tia feglia Daniela